

12 SEP 2001

Mahathir-Kutuk

MALAYSIA KUTUK SERANGAN TERHADAP AMERIKA SYARIKAT

KUALA LUMPUR, 12 Sept (Bernama) -- Malaysia mengutuk serangan pengganas yang mengakibatkan kemusnahan teruk terhadap Amerika Syarikat pada Selasa dan berdukacita dengan kehilangan banyak nyawa dalam tragedi itu, Perdana Menteri Datuk Seri Dr Mahathir Mohamad memberitahu Presiden Amerika George W. Bush hari ini.

"Sejajar dengan dasar kami menentang semua bentuk keganasan, Malaysia menyertai negara lain dalam mengutuk tindakan dahsyat ini," kata Dr Mahathir dalam perutusan takziahnya kepada Bush. Salinannya dihantar melalui faks kepada Bernama.

Dua pesawat komersil yang dirampas, merempuh dan meranapkan menara kembar Pusat Dagangan Dunia di New York sementara sebuah lagi pesawat melanggar kompleks Pentagon yang menempatkan Jabatan Pertahanan Amerika di Washington pada Selasa.

Para pegawai Amerika menganggarkan beribu-ribu mati atau cedera dalam tragedi pagi itu kerana menara kembar itu sahaja menempatkan kira-kira 50,000 pekerja.

Dalam perutusannya, Dr Mahathir memberitahu Bush bahawa beliau amat sedih dan terkejut dengan serangan pengganas itu.

"Kerajaan dan rakyat Malaysia turut bersama anda serta rakyat Amerika Syarikat berdukacita dengan kehilangan banyak nyawa dan berkongsi kesedihan yang dirasakan kaum keluarga ramai mangsa.

"Doa kami bersama anda dalam menghadapi tragedi ini," kata Dr Mahathir.

Dr Mahathir juga bercakap dengan Robert Reis, Kuasausaha Kedutaan Amerika di sini untuk menyatakan rasa prihatinnya mengenai serangan itu dan supaya Reis menyampaikan ucapan takziahnya kepada Bush.

Sementara itu, Wisma Putra dalam satu kenyataan berkata Dr Mahathir hari ini memberitahu kerajaan Russia dan Jerman bahawa beliau telah memutuskan untuk menangguhkan rancangan lawatannya ke Moscow dan Berlin.

Penangguhan itu dibuat memandangkan ketidaktentuan ekoran serangan dahsyat pengganas terhadap Amerika, menurut kenyataan itu sambil menjelaskan bahawa lawatan itu akan dijadualkan semula selepas berunding dengan kedua-dua kerajaan berkenaan.

Menteri Luar Datuk Seri Syed Hamid Albar dalam kenyataannya berkata Malaysia begitu terkejut dengan serangan yang membawa kemusnahan itu terhadap Amerika.

"Malaysia bersedih dengan kehilangan nyawa yang tragik itu dan menghulurkan takziah kepada rakyat Amerika dan keluarga mangsa yang tidak bersalah dalam tragedi dahsyat itu," katanya.

-- BERNAMA

AFY AHH RON